



Atvinnuvega- og nýsköpunarráðuneytið
Skúlagötu 1
101 Reykjavík

postur@anr.is

Reykjavík, 26. mars 2020

Efni: Umsögn um drög að frumvarpi til laga um opinberan stuðning til fjárfestinga í sprota- og nýsköpunarfyrirtækjum, mál nr. 79/2020.

Samtök atvinnulífsins og Samtök iðnaðarins (samtökin) lýsa yfir stuðningi við frumvarpsdrögin. Með fyrirhugaðri lagasetningu er ætlunin að stofna til sérstakrar markáætlunar um fjárfestingu í sprota- og nýsköpunarfyrirtækjum með nýjum sjóði (Kríu) sem tekur þátt í fjármögnun sjóða sem annast síðan fjárfestingar. Í greinargerð er tekið fram, án þess að þess sé getið í frumvarpsdrögunum, að sjóðirnir sem Kría muni styðja við þurfi að vera nýstofnaðir, að þeir séu lokaðir, að þeir séu að lágmarki 4 milljarðar króna að umfangi og að þeir megi ekki hafa hafid fjárfestingar. Í frumvarpsdrögunum sjálfum kemur fram að eignarhlutur Kríu í einstökum sjóðum geti numið að hámarki 2 milljörðum króna og fari ekki yfir 30% af viðkomandi sjóði. Það má íhuga hvort rétt sé að taka fram í væntanlegu frumvarpi að sjóðirnir verði að vera nýstofnaðir, lokaðir og þurfi að hafa ákveðið umfang en það gæti aukið skýrleika væntanlegra laga. Þá vilja samtökin benda á að krafa um aðkomu erlendra aðila gæti reynst íþyngjandi.

Gert er ráð fyrir að ráðherra setji reglugerð sem fjallar um framkvæmd laganna og telja samtökin mikilvægt að drög að henni verði kynnt til umsagnar áður en hún verður sett. Samtökin áskilja sér rétt til að koma fram með athugasemdir á síðari stigum, meðal annars um einstök ákvæði reglugerðar.

Samtökin telja jákvætt að ríkissjóður hvetji til stofnunar sjóða sem fjárfesta í íslenskum nýsköpunar- og sprotafyrirtækjum án þess að ríkið sé sjálft leiðandi eða beinn fjárfestir í atvinnulífinu. Þarna er um að ræða viðbót sem fyllir í ákveðið rof í keðju sem leiðir frá rannsóknum, tækniþróun og að því að fyrirtæki þurfa að leita sér fjármögnunar í formi eiginfjár til að styðja við frekari nýsköpun og ekki síður að koma hugviti, þjónustu og vörum á markað – sem oft reynist þrautin þyngri. Markmiðið með Kríu á að mati samtakanna að vera að stuðla að þroskuðu fjárfestingarumhverfi nýsköpunar- og sprotafyrirtækja sem styður við vöxt á alþjóðamörkuðum.

Samtökin telja þó mikilvægt að framlag ríkisins til Kríu verði ekki til þess að draga úr fjármagni sem rennur til Tækniþróunarsjóðs sem er mikilvægasta tæki ríkisins til að styðja við rannsóknir, tækniþróun og nýsköpun í atvinnulífinu og samstarf fyrirtækja, stofnana og háskóla.

Virðingarfyllst,

f.h. Samtaka atvinnulífsins

Halldór Benjamín Þorbergsson,
framkvæmdastjóri

f.h. Samtaka iðnaðarins

Sigurður Hannesson,
framkvæmdastjóri.